

VENDIM
Nr.825, datë 14.5.2008

PËR KRIJIMIN DHE FUNKSIONIMIN E QENDRËS KOMBËTARE TË EDUKIMIT NË
VAZHDIM, TË PUNONJËSVE TË SHËNDETËSISË DHE PËR NJË SHITESË NË
VENDIMIN NR.306, DATË 27.6.2002 TË KËSHILLIT TË MINISTRAVE

Në mbështetje të nenit 100 të Kushtetutës dhe të nenit 10 të ligjit nr.9000, datë 30.1.2003 “Për organizimin dhe funksionimin e Këshillit të Ministrave”, me propozimin e Ministrit të Shëndetësisë, Këshilli i Ministrave

VENDOSI:

1. Krijimin e Qendrës Kombëtare të Edukimit në Vazhdim, të punonjësve të shëndetësisë, si person juridik, publik, buxhetor, në varësi të Ministrisë së Shëndetësisë, për nxitjen dhe zhvillimin profesional të të gjitha kategorive të personelit të shëndetësisë, me synim rritjen e njohurive dhe zhvillimin e aftësive, në funksion të përmirësimit të cilësisë së shërbimeve të kujdesit shëndetësor.

2. Qendra Kombëtare e Edukimit në Vazhdim do të shërbejë si agjenci teknike e Ministrisë së Shëndetësisë për:

- planifikimin, bashkëpunimin dhe zbatimin e programeve të formimit të vazhdueshëm të punonjësve të shëndetësisë;

- bashkërendimin e punës dhe realizimin e procesit të akreditimit të programeve dhe veprimtarive të zhvillimit profesional, pa përfshirë programet, që varen nga Ministria e Arsimit dhe Shkencës e strukturat e saj;

- procesin e certifikimit të personelit të shëndetësisë;

- realizimin e studimeve të vlerësimit të nevojave për formim të vazhdueshëm, për kategori të ndryshme të punonjësve të shëndetësisë ose për sektorin e shëndetësisë, në përgjithësi;

- vënien në zbatim të programeve të trajnimit, përmes mobilizimit dhe kontraktimit të universiteteve, shkollave universitare, institucioneve akademike, si dhe organizatave të specializuara, shqiptare ose të huaja;

- funksionimin, si bazë informacioni për veprimtaritë e formimit të vazhdueshëm profesional, dhe si bazë dokumentacioni, për materialet pedagogjike, të përdorura gjatë këtyre veprimtarive;

- mbështetjen, rritjen e njohurive dhe përmirësimin e aftësive për teknikat andragogjike (pedagogjia për të rriturit) të trajnerëve, në fushën e shëndetësisë;

- bashkëpunimin me institucionet arsimore, që përgatisin specialistë të shërbimit shëndetësor, si dhe me të gjitha institucionet shëndetësore e organizatat profesionale, në mbështetje të procesit të certifikimit të personelit, në fushën e shëndetësisë.

3. Marrëdhëniet e punës së punonjësve të kësaj qendre rregullohen me ligjin nr.7961, datë 12.7.1995 “Kodi i Punës në Republikën e Shqipërisë”.

Mënyra e funksionimit dhe rregullimi i marrëdhënieve në punë të punonjësve përcaktohen në rregulloren e qendrës, të miratuar nga Ministri i Shëndetësisë.

4. Emërimi, lirimi ose shkarkimi nga detyra i drejtorit të qendrës bëhen në përputhje me procedurat e përcaktuara në vendimin nr.173, datë 7.3.2003 të Këshillit të Ministrave “Për emërimin dhe lirimin ose shkarkimin nga detyra të drejtuesve të institucioneve, në varësi të Këshillit të Ministrave, Kryeministrit ose të ministrit”.

5. Detyrat dhe përgjegjësitë e drejtorit të Qendrës janë:

- Hartimi i planit kombëtar të veprimtarive të formimit të vazhdueshëm dhe zhvillimit profesional të punonjësve të shëndetësisë, të cilin e dërgojnë, për miratim, në Ministrinë e Shëndetësisë.

- Zbatimi i planit kombëtar të formimit të vazhdueshëm dhe të zhvillimit profesional, që miratohet nga Ministria e Shëndetësisë.

- menaxhimi i fondeve buxhetore, që jep Ministria e Shëndetësisë për formimin e vazhduar, si dhe nxitja për çeljen e fondeve nga burime të tjera financimi.

- Bashkërendimi i veprimtarive të trajnimit, që organizohen nga Ministria e Shëndetësisë dhe nga donatorët e organizatat e financuara prej tyre.

- Bashkërendimi dhe akreditimi i programeve të trajnimit të vazhdueshëm, si dhe i veprimtarive të tjera të zhvillimit profesional.

- Bashkëpunimi i ngushtë me institucionet arsimore, që përgatisin specialistët e shërbimit shëndetësor, si dhe me të gjitha institucionet shëndetësore e organizatat profesionale, në mbështetje të procesit të certifikimit të personelit, në fushën e shëndetësisë.

- Emërimi, lirimi a shkarkimi i stafit të qendrës, mbështetur në përkrahjet e vendeve të punës dhe në aktet ligjore në fuqi.

- Përfaqësimi i qendrës në marrëdhënie me të tretët.

6. Pranë qendrës funksionon këshilli konsultativ, si organ këshillimor i drejtorit.

Këshilli përbëhet nga tetë persona:

a) Përfaqësuesi i Ministrisë së Shëndetësisë;

b) Përfaqësuesi i Institutit të Shëndetit Publik;

c) Përfaqësuesi i Institutit të Sigurimeve të Kujdesit Shëndetësor;

ç) Përfaqësuesi i Fakultetit të Mjekësisë;

d) Përfaqësuesi i Fakultetit të Infermieristikës;

dh) Përfaqësuesi i Urdhrit të Mjekut;

e) Përfaqësuesi i Urdhrit të Infermierëve;

ë) Përfaqësuesi i Urdhrit të Faramacistëve.

7. Qendra duhet të bashkëpunojë me Fakultetin e Mjekësisë, Fakultetin e Infermierisë, si dhe urdhërat e profesionistëve për ngritjen dhe funksionimin e sistemit të edukimit në vazhdim.

8. Efektet financiare, që rrjedhin nga zbatimi i këtij vendimi, dhe organika e qendrës të përballohen, përkatësisht, nga buxheti dhe numri i përgjithshëm i punonjësve, miratuar për vitin 2008, për Ministrinë e Shëndetësisë.

9. Në lidhjen I, kreu 1.9, të vendimit nr.306, datë 27.6.2002 të Këshillit të Ministrave “Për miratimin e strukturës dhe nivelit të pagave të punonjësve me arsim të lartë në sistemin e Ministrisë së Shëndetësisë”, të ndryshuar, të shtohet emërtimi “Qendra Kombëtare e Edukimit në Vazhdim të punonjësve të shëndetësisë”.

10. Ngarkohen Ministria e Shëndetësisë dhe Ministria e Financave për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha

Tabela nr.1

STRUKTURA E QERNDRËS KOMBËTARE TË ZHVILLIMIT PROFESIONAL




Tabela nr.2

ORGANIKA E QENDRËS KOMBËTARE TË ZHVILLIMIT PROFESIONAL

Drejtoria

Drejtori 1

Sekretare 1

SEKTORI I VLERËSIMIT, PLANIFIKIMIT, KOORDINIMIT

Shef sektori 1

Specialist 2

SEKTORI I ZBATIMIT TË PROGRAMEVE TË TRAJNIMIT

Shef sektori 1

Specialist 2

SEKTORI I AKREDITIMIT

Shef sektori 1

Specialist 2

SEKTORI PEDAGOGJIK DHE TEKNIK

Shef sektori 1

Specialist 1

SEKTORI ADMINISTRATËS DHE FINANCËS

Shef sektori 1

Specialist 2

Shofer 1

Pastruese 1

Gjithsej

18